

13. okt. 2016

UKA2016/36 - 50

Ullutsinnut naleqquttumik ingerlatsinikkullu illersorneqarsinnaasumik Inuusuttut Inuiaqatigiinni Kiffartuussisarnerisa eqquteqqinneqarnissaanik inassuteqaasiortussamik suleqatigiissitamik Naalakkersuisut pilersitseqqullugit peqquneqarnissaannik Inatsisartut aalajangiiffigisassaattut siunnersuut. Inernera Inatsisartunut saqqummiunneqassaaq UPA2017-imi.

(Siumup Inatsisartunut ilaasortaaitai)

Inatsisartunut aaliangiiffigisassatut siunnersuut Naalakkersuisut UPA 2017-imut peqquneqassasut inuusuttut 16-iniit 29-nik ukiullit ilanngullugit suliffissarsiortutut allatsissimasut, ilinniagaqalernissaat suliffittaarnissallu siunertaralugu immikkut ittumik pilersaarusiussasut.

(Inatsisartunut ilaasortaq Múte Bourup Egede, Inuit Ataqatigiit)

Siumumiit nuannaarutigaarput oqaluuserisassanut pisariaqartunut aalajangiiffigisassanngortitsinikkut oqaluuserisassanngortitsisoqarmat.

Aallarniutigalugu oqartariaqarpugut piumassuseq pigineqarpat sooq aqqissugaanikkut periarfissiisoqassanngila?

Nunarput ingerlalluartoq namminersulivissimasorlu anguniagaraarput, taamaammat pingaaruteqarpoq sapinngisamik pisinnaasut tamarluinnarmik piginnaasaat nunatsinni naleqqussartuarlugit piginnaangorsaanikkut naleqqussaannikkut ingerlatsiuarmissaq.

Sulisinnaasut tamarluinnarmik nunatsinni atorfissaqarlutik tunniusseqataanissaminnut periarfissaqartinneqartariaqarput, ilisimasat piginnaasallu tamarmik nunatsinnut iluaqutissanngorlutik kivitseqatigiiffiullutik tunniussa qarfiusariaqarmata.

Ajoraluartumik kisitsit takutitsipput inuusuttut akornanni ilinniakkaminnik unititsiinartartut ikisigisassaangitsut, tamanna arlariinnik patsiseqartartoq ilisimaneqarpoq, aamma arlaqartut oqariartuutigisarpaat ilinniarlutik aallarereeraluarlutik paasisaraat ilinniarfigilersimasaagaluaq imminerminnut tulluurtuunngitsoq, taamaattoqartillugu piffissamik eqqarsarfissaqarnerup nalaanni periarfissaasinnaalluarpoq inuiaqatigiinnut kiffartuussinermut atussallugu. Pingaaruteqarnerli tassajuassaaq ilinniartitaanikkut ingerlariaqqinnissaq.

Ilisimasaneqarpoq suliffissaaleqisut qimerluuualaraani suliffissaaleqinermut patsisit pingaarnerit ilagigaat ilinniarsimasuunnginneq, aamma ilisimaneqarpoq nunarsuarmi sumulluunniit pigaluarutta atuagarsornikkut ingerlatserusunngitsunik ilaqaratta kisiannili sulisinnaasutsikkut annertuumik kivitssinnaasunik, aamma inuusuttortaqarpugut atuareernerup kingorna sumut ingerlaqqinnissamik piffissamik pisariaqartitsillutik allamut saakkallarusuttartunik. Taamaammat pingaaruteqarpoq

nunatsinni aaqqissugaanikkut pisariaqartitanut ikaarsaariarnissamik pisariaqartitsisunut inissaqartitsissalluta.

Siumumiit nuannaarutigaarput Naalakkersuinikkut suliniutit arlaqartut naleqqussaavigalugit ingerlanneqarmata, aamma ingerlaavartumik sumiiffinni inoqarfinni pissutsit tunngavigalugit periarfissanik ammartuisinnaanissaq pisussaaffiusariaqartoq naqissuserumallugu.

Pingaaruteqarpoq ullumikkut pissutsit oqaluttuarisaanermik aallaaveqartut atuuttut qiviarlugit oqariartussalluta, sumiluunniit ingerlaniartunut pingaaruteqarnerit ilaat tassaammat piumassuseq inummiittoq, taanna peqanngippat suliniutit angorusutallu suugaluartulluunniit ilaannakortumik iluatsittarput, taamaammat pisariaqarpoq naleqqussaanaissaq piumassuseq atuutillugu.

Maani inersuarimi qanorluunniit oqalukkaluarutta inuup qanoq ingerlanissaanut aalajangiissuunerpaaq tassaavoq inuk nammineq. Assersuutigalugu ilinniarnissamut periarfissat ammappata, sinaakkusiornerput tunngavigalugu, inuup nammineq atuarniakkani quppertussaavaa, namminerlu atuakkani paasisariaqarlugit. Taamaammat inuiaqatigiit imminut kivillutik ingerlalnissaanut marloqiusamik isiginnittoqartariaqarpoq, pisortat aqutissiuisussapput kisiannili aqqummi ingerlasussat tassaapput inuiaqatigiit nammineq alloriarnernik tiguisussat.

Inuiaqatigiit kiffaangissuseq atorlugu tunniussa qarussuttarnerat ukiuni arlaqaleqisuni suliniuteqarfigineqartuarpoq annertusaavigineqarumajuarluni. Meeraanermiit inersimasunnngornissamut inuiaqatigiit akornanni kiffartuussinerit saqqummilaarpata aamma assinganik nuannaartorineqarlutik siammariartulissapput.

Taamak oqaaseqarluta Siumumiit oqaluuserisassanngortitsisunut qujalluta inuusuttut ingerlariaqqinnissaannik suliniutinik periarfissiisussanik siunnersuuteqarneq taperserlugu siunnersuutit Inuussutissarsiornermut ataatsimiititaliamut ingerlasussanngorlugit inassuteqassaagut.

Suka K.Frederiksen
Siumut